

Pol-ate kaapiya tu yuuu la vu Timoti

¹ + o 1:1 Ep 1:1*Sa Pol, ond Anutu yoo ka vu be Yesu Kalisi holin sa be saatu sinaale, in nambe sa naanêêl Anutu-te vakasin sen jôôy-ato langaah naambe yiii naatu Yesu Kalisi-te hil, le mem Anutu le bu metumin vu yiii.

² + o 1:2 1Ti 1:2*Sate Timoti dakaa-e, sa kaavu kaapiyaa-jo laas vu hong. Aamangg Anutu yuuu yate Omaaho Bop Yesu Kalisi lambiing samu samu osin ka pasiv naas mando gaving hong-ambe galompayo nanjip melaas

Yaningg-ame naamum in banye nivasa le

³ + o 1:3 Pil 3:5; Sin 23:1; 24:16*Sa naalohak la vu Anutu sen sa navu sapa hôôk vaha osin sa longgpayo nikaapiik-ato, yik nambe sen sa bungg-aso sapa hôôk bôôy-ato, ond sa kangg navu hong hôôk lohakin langaah-ande busin-ambe sa naapêêlis la vu Anutu. ⁴ Tonde sa kangg vu sen gamem luk kaasêêh-ato, om sa naawiingin nambe anaas aangge hong jesin naah-ambe mem sa kangg vasa dôôk. ⁵ + o 1:5 Sin 16:1*In sa kangg vu nambe gawii-having osin galompayo timu nambe sen bumaavêêh Lois-ande tam Yunis-ato, tombe yik sa lak ni vanuh nambe gawii-having nambêêñju having, ⁶ + o 1:6 1Ti 4:14*ondeey saawiingin nambe aambêêl gakam ak in gakam bu Anutu-te niwêêk kul-ate sen bôôy sa hambe

namangg ak galum-ambe lukalaas galompayôôto. Om gêen-anjo gambiing kul ak Anutu-te niwêêk-anja be naatu bopaata jak, naambe sen hil dave hôök kin-ambe natum bopaataa-to. ⁷ + o 1:7 Lom 8:15*In Anutu vu Vavi Vaambuung vu yiyy ond me-nawiing in nambe yaanjêénin e, nganjo navu niwêêk vu yiyy, osin nawiing in nambe yahengg gaving omaahonôôn-ambe yiyy oo anjakin yiyy nivasa mu.

⁸ + o 1:8 Lom 1:16*Game ganjêénin hil-ambe gambun yate Omaaho Bop-ate vakasin e, nganjo goo naanêêl langaah. Tonde yik game ganjêénin hil-ambe onaatu kam in yite omaaho kalaambus sa le, malis, yik goo gako niwêêk vu Anutu be ombaaku nimeen in onaanêêl yite banye nivasa gaving sa. ⁹ + o 1:9 Ep 2:8-9; Tit 3:5*In Anutu hako yiyy lom-ambe teey yiyy in nambe yiyy naatu yite hil amu, lemu me-ka vu yate kul anivasa sen yiyy naawiing ondeey teey yiyy e, malis, nganjo yoo ka vu be wiing samu samu vu yiyy nyemalis amu. Anutu me-hatung ngaanggis e de yoo wiing samu samuu-jo vu yiyy hôök Yesu Kalisi munggin-ambe neep. ¹⁰ + o 1:10 1Ko 15:55-57; Hiblu 2:14*Tombe mem gêen Yesu Kalisi, omaaho sen hako yiyy lom-ato, tok laam langaah lung la, tombe Anutu taato yite samu samu sen vu vu yiyy ak Kalisii-to neep langaah. In Yesu Kalisi laanggôôl yimbin-ate niwêêk, de yite banye nivasa vêêl metumin sen yiyy mando danggataa-to laam langaah. ¹¹ + o 1:11 1Ti 2:7*Yik yii-ju yoo hatung sa be saatu sinaale osin kaputung in nambe sa naanêêl banye nivasa langaah, ¹² ondeey soo naaku nimeen. Lemu

sa ningg-amē namum in e, malis, in soo alak omaaho sen saawii-having yii-jo ni lung la, tombe saawii-having vulōōt nambe yoo le ganggin yite kul ayuuh amē sen vu lukala sa namangg-anjo nivasa lōōt-ambe naatok na balup busin sen nomato.

¹³ + o 1:13 1Ti 4:6; 6:3; Tit 1:9; 2:1*Om vakasin nivasa sen sa taahu hong hôōk-ato ond yik osapa hôōk, de goo gambiing gaving Yesu Kalisi niwêēk-ambe gahem gaving yi, in gatu yite va lung laa-to.
¹⁴ + o 1:14 1Ti 6:20*Om goo naalum in va nivasa sen Anutu vu lukala onamam-ato be ongganggin nivasa, tonde Vavi Vaambuung sen nando hôōk yalonggpayô-to ond yoo le dôōvu hong in kul-anjo.

¹⁵ + o 1:15 2Ti 4:16*Galak ni nambe hil pin vu Esia, de Piselas ayuuh Hemosenis having, ond sil laluuh damind vu sa. ¹⁶ Om sa naalohak in nambe Omaaho Bop aka pasiv in Onesipolas gaving vane be noondin, in busin ngeeyaata ond Onesipolas laam nayi sa be navu samu sa longgpayo, de me-nayêénin hil-ambe natu ka in sa in sen sa naaluus kalaambus-anjo le, malis. ¹⁷ Nganjo naahen valup Lom atombe yoo salo sa pavismabe mem tovu sa, ¹⁸ + o 1:18 Jut 21*om Omaaho Bop aka pasiv in yi hôōk busin taamusin sen nomato. In Onesipolas-anjo ond yoo hôōvu sa balon ngeeyaata vu Epesas-ambe goo galak ni vanuh-ato.

2

Onaatu Yesu Kalisi-te omaaho vaavis anivasa

¹ Noongg-e, onggako niwêêk vu Yesu Kalisi-te samu samu sen navu vu yiiy-ato be onaatu omaaho niwêêk jak. ² De vakasin sen ohango saanêêl hôôk hil ngeeyaata mend-ato, ond yik otaahu vu hil anivasa vaalu sen sil lalohvu nambe taahu hil ango dôôk-ato.

³ + o 2:3 2Ti 1:8; 4:5*Ke, om goo naatu Yesu Kalisi-te omaaho vaavis anivasa, be ombaraaku nimeen gaving hey vaalu. ⁴ In vaavis-aso dala ngaamong ond me-dawiing kul vaalu having e, malis, yik yoo dala ngaamong timu in nambe silate yêêv lanji sil-ambe ahend anivasa vu sil. ⁵ + o 2:5 2Ti 4:8*Tonde omaaho ti gatup-ambe kaluuuh ango-so, ond yoo gatup-ambe sapa hôôk mopaatôôv hatupin nivalok, le naambe nama ond me-le gako nôôn anivasa ti le. ⁶ + o 2:6 1Ko 9:7,10*Tonde omaaho sen nawiing kul bopaata be naalôôh vanôôn-ato, ond yoo gako yite vanôôn nôôn vaalu sen nasupin-ato naamunggin hil vaalu pin, ond mem lohvu. ⁷ Om gakam oo bu vakasin sen sa naanêêl-anjo, le mem Omaaho Bop e tatekin vu hong-ambe mem ganjak vakasin pin-anjo danggakook ani.

⁸ + o 2:8 1Ko 15:4,20; Lom 1:3*Ke, om gakam oo bu Yesu Kalisi sen yite danggakook neep vu Devit-ato, ond yimb-ambe kandi lak laah, lohvu sen sa naanêêl hôôk banye nivasaa-to. ⁹ + o 2:9 Ep 3:1; Pil 1:12-14*Tombe yik sa naanêêl banye nivasaa-jo ondeey sa naaku nimeen-ambe sil landuuuh sa lohvu omaaho nipaya ti, lemu me-landuuuh Anutu-te vakasin e. ¹⁰ + o 2:10 Ep 3:13; Kol 1:24*Om sa longgpayo yoo niwêêk-ambe sa naaku nimeen pin-anjo in nambe saandôôvu hil sen

Anutu yoo holin sil in nambe daatu yite hil-ato, tonde mem Yesu Kalisi gako sil naah vu Anutu be sil mando hôök yite nikaapulis danggata osin danggata.

¹¹ + o 2:11 2Ko 4:11*Om yik vakasin-anjo keen lôôt nambe,

“Yaavu yiay la osin doos in nambe yaanggimb ak Kalisi haale, ond mem yale mando metumin gaving yi. ¹² + o 2:12 Mat 10:33*Om naambe yiay baale niwêek-ambé baaku nimeen pin, ond yik yale naatu lulemak gaving yi, le naambe yiay naatu kangg in yi, ond yik le naatu ka in yiay gaving. ¹³ + o 2:13 Lom 3:3-4; Nam 23:19; Tit 1:2*De yiay naanêél naambe yamengg navu sapa yi, le ma de yiay gavuuh yi na, nganjok yoo navu sapa hôök yite vakasin amu, de me-lohvü nambe kaange yite vakasin-anju le, malis lôôt.”

Onaatu Anutu-te kul vaha nivasa ti keen in nambe ji hong nivasa

¹⁴ + o 2:14 1Ti 6:4; Tit 3:9*Gambêél hil alund jak in vakasin-anjo, be gambu kôôvu sil ak Anutu haale naambe sil-ame mahôöh sil lôôt in vakasin vaalu le, in vakasin mahôôsin ond me-lohvü nambe dôôvu omaaho ti le, malis, nganjo nawining nipaya vu hil sen dando dangoyin-ato mu.

¹⁵ + o 2:15 1Ti 4:6; Tit 2:7-8*Om goo gambiing kul aniwêek in nambe mem Anutu ji hong nivasa naambe gatu kul vaha nivasa ti keen-ambe onanêél yite vakasin keen-ato nivalok, de ganime ame namum in e. ¹⁶ + o 2:16 1Ti 4:7*Tonde goo ganoh nanye in vakasin mali-malis vaha sen

nôôn maa-to, in vakasin mali-malis nambêênjo ond le naanggiy hil-ambe mem landukana mop sen galuuuh damind vu Anutuu-to. ¹⁷ + o 2:17 1Ti 1:20*Tombe silate vakasin mali-malis-anju lohvu payêês bopaata sen haya hôök omaahonôôn vahand in naatu bopaata jak lôôt-ämbe la nalohvu omaahonôôn pin. Ke, hil-anju silate omaaho yuuuh ond Haimenias ayuuuh Pailitas. ¹⁸ Hil-anju ond daloh paya in vakasin keen-ato om danêêl nambe yiyy kandi lak lung la de yame le kandi jak naah vu taamusin e. Ke, danêêl nambêênjo tombe nawiing nindanjeen vu hil vaalu sen lawii-having vakasin keen-ato.

¹⁹ + o 2:19 Nam 16:5,26; Jon 10:14; 1Ko 8:3; Ais 52:11*Lemu Anutu-te hil bel-ate ond sil lalohvu ngaandiin aniwêek sen Anutu haav-ambe naale lung laa-to, tombe ngaandiin-anju kaavu vakasin neep ak nambe, “Omaaho Bop yoo lak yite hil anind.” Tonde ango neep having nambe, “Hil pin sen danêêl nambe Omaaho Bop-ate hil sil-ato ond sil oo galuuuh damind vu va nipaya.”

²⁰ + o 2:20 1Ko 3:12*In bayêén bop ti ond dêêngg ayuuuh kaambum nando hôök, tonde vaalu ond sil samu lak gool osin siliva, de vaalu ond sil lasap haah, tonde sil langgi heey ak ngaanggis, tombe vaalu ond kul anivasa-te, de vaaluk kul mali-malis-ate. ²¹ + o 2:21 2Ti 3:17*Om naambe omaaho ti galuuuh dami vu hil-anju osin silate vakasin tatuhin de mando nivasa, ond le mando naambe kaambum sen kul anivasa keen-atêêto, in tu vaambuung-ambe nando in nambe yite omaaho bop biing kul anivasa pin jak yi.

²² + o 2:22 1Ti 6:11*Om goo napak in kakook

anipaya sen nalup maanggêêm-aso londpayôô-to, tonde goo mosapa hôôk va nivalok osin gambiing gaving, de gahem gaving hil osin galompayo naalum melaas gaving hil sen londpayo la vu Omaaho Bop timu be lavand nahôôk yii-to. ²³ + o 2:23 1Ti 4:7*Tonde onggaluuh damim vu vakasin sen nôôn ma be hil sen lundkook ma danêêl sil in-ato, in galak ni nambe vakasin nambêêñja natu ngaamong vu hil. ²⁴ + o 2:24 1Ti 3:3; Tit 1:7*De Omaaho Bop-ate kul vaha-so ond ti memahôôh hil in vakasin e, nganjo yoo biing va melaas amu vu hil pin, yik yoo taahu hil hôôk va nivasa mu, de me-ahekalin-ambe bu dôôk hil-ate nipaya sen lawiing yi payaa-to nyevahaan e. ²⁵ + o 2:25 1Ti 2:4*De naanêêl kalêêsin ambuso ond naanêêl sil osin melaas. Ke, mak biing naambêêñjo ond Anutu le dôôvu sil, tombe sil langgilin sil alondpayo be mem lanjak vakasin keen ani. ²⁶ In bôôy ond Saalang hako sil hôôk yite govak in nambe sil oo monggatung nanyend in Saalang lava, le naambe lanjak vakasin keen ani, ond sil alundkook e biing kul anivasa jesin naah atombe mem sil gavuuh Saalang-ate govak na.

3

Busin ahus ond va nipaya ngeeyaata le naatok naam

¹ + o 3:1 1Ti 4:1*Goo ganjak vakasin-anjo ni naambe vu busin taamusin ond nimeen ngeeyaata lôôt e naatok naam. ² + o 3:2 Lom 1:29-31*Tombe omaaho ti ti ahe yoo le gaving yi, tonde ahend e gaving mone lôôt, tombe sil oo le

gako sil haalend jak, osin sil gatee sil jak danjeen-ambe daanêél hil pale, de sil e kalêéh maandin ayuuuh taandin lavand. Sil-ame le daapêélis vu hil sen davu samu sil-ato le, nganjo sil e lanji va nivasa yuuh ame naambe va malis. ³ Sil ahend-ame le gaving halindin-aso noondin-aso daka le, de sil ahend-ame le naakuuh daka le, malis, yik sil e daanêél vakasin anipaya jak hil noh nanye, tonde sil-ame lalohvu nambe me-le lanjakin sil daka le, nganjo yoo le lambiing navu dees vu hil lôôt, osin le lanji va nivasa pin paya. ⁴ Tonde le lambu halindin landukana vaavis namand in nambe lanyiis, de pavis atombe sil lambiing va nindanjeen, tonde sil e gatee sil jak naambe sil bop, osin ahend oo le gaving liiy vaha vaha voonate, de ahend-ame le gaving Anutu daka le. ⁵ + o 3:5 Mat 7:15,21; Lom 2:19-20; Tit 1:16*Sil e kaasiyy sil naavind ak Anutu-te vakasin malis amu, lemu sil-ame lawii-having yite niwêek e. Hil-anja ond goo ganoh nanye in sil.

⁶ + o 3:6 Tit 1:11*Hil-anja sil vaalu dasengg-ambe dalakala bayêén vu vêéh sen lundkook maa-to be dalu sil nalund ak vakasin tatuhiin. Vêéh-asôônju ond va nipaya ngeeyaata nawiing-ambe sil alondpayo nimeen, tombe kakook vaha vaha naanjiihin sil having. ⁷ + o 3:7 2Ti 2:25*Vêéh-asôônju yoo mondango vakasin amu, lemu sil-ame lalohvu nambe lanjak vakasin keen ani le. ⁸ + o 3:8 Eks 7:11,22; 1Ti 6:5*Bôôy ond Janis ayuuuh Jamblis dawiingin nambe daanggôôl Mose, om yik hil sen-anja ond dawiingin nambe daanggôôl vakasin keen. Sil alundkook la paya lung la, tonde sil-ame lalohvu vakasin keen sen yaawii-having-

ato daka le, malis lôôt. ⁹ Lemu hil ngeeyaata mele lambiing gaving sil e, malis. Yik hil pin e lanji hil-anju dawiing va osin lundkook ma, naambe sen böôy hil layi Janis ayuu Jamblis lawiing va osin yuuuh alundkook maa-to.

Gamem oo sapa Anutu-te vakasin

¹⁰ Lemu hong ond gahem having sa be galak sate vakasin ani sen sa navu tatekin vu hil-anjuuto lung la, osin va pin sen sa naawiing-ato, tonde mopaatôôv sen sa navu sapaa-to, osin va sen soo aawii-having Anutu niwêêk-ato, tombe same ahekalin pavi-pavis e, nganjo soo naawiing kul vu hil lôôt. Tonde galak sa ningg nambe sa-hengg oo naving hil osin soo naale niwêêk-ambe naaku nimeen. ¹¹ + o 3:11 Sin 13:50; 14:5,19; Saam 34:19*Tonde va nindanjeen pin sen hil dawiing vu sa osin nimeen pin sen tovu saa-to, tonde va sen tovu sa neep Antiok-ande Ikoniam osin vu Listlaa-to ond yik galak ni nambe hil lawiing nindanjeen vu sa lôôt vuu-ju, lemu Omaaho Bop oo lôôh sa vêêl in nimeen pin-anju. ¹² + o 3:12 Mat 16:24; Jon 15:20; Sin 14:22*Keen, hil pin sen lawiingin nambe lanjalak Yesu Kalisi

be lambiing va sapa Anutu kaa-to, ond omaahonôôn e lambiing nindanjeen vu sil. ¹³ Tonde hil anipaya osin tatuhin ambu-so le tatuhin hil, de sim Saalang oo

le tatuhin hil anipaya-sôônju, tombe mem sil pin daatu hil anipaya valok-ate.

¹⁴ + o 3:14 2Ti 2:2*Lemu hong ond gamem oo sapa vakasin sen ohango be gawii-having niwêêk-ato, in hey sen hey taahu hong-ato ond

galak hey aningg lung la. ¹⁵ + o 3:15 Jon 5:39*Tonde galak ni having nambe bôoy sen goo naahen unoopasiv-ato, ond goo monangoyin vakasin hôök Anutu-te kaapiya be galak ni, tombe kaapiyaa-ju lohvnu nambe naanggiy hong-ambe onaatokak mopaatôôv sen galompayo na timu vu Yesu Kalisi in nambe mem Anutu gako hong naah vu yii-to.

¹⁶ + o 3:16 Lom 15:4; 2Pi 1:21*Yik Anutu-te vakasin pin sen lukaneep kaapiyaa-to ond Anutu yoo vu vu hil-ambe sil kaavu, tombe vakasin-anjo ond nivasa lôôt in nambe tatekin vakasin keen vu yiiy, tonde taato yate va nipaya vu yiiy, osin

naanggiy yiiy dukanaah Anutu-te mop, tonde taahu yiiy hôök va nivalok. ¹⁷ + o 3:17 2Ti 2:21*Om mem yiiy sen yaatu Anutu-te hil-ato, ond yiiy oo aatu hil aniwêek lung la be yaalohvu lôôt in nambe yaambiing kul anivasa pin.

4

Goo naanêêl Anutu-te vakasin keen-ato niwêêk lôôt

¹ + o 4:1 Sin 10:42; Lom 14:9-10*Yesu Kalisi le gangoyin hil sen dando memoos osin hil sen layimb-ato silate vakasin pin. Yesu Kalisii-ju le naatok naam hil pin amend-ambe mem naatu omaaho lulemak-ambe ganggin yite va pin mando danggata osin danggata. Om sa naanêêl niwêêk vu hong jak Anutu yuuuh Yesu Kalisii-ju haalend naambe ² + o 4:2 Sin 20:20,31*goo monaanêêl yite tanasin langaah. Naambe hil lawiingin nambe gangoyin ond onaanêêl, le naambe me-lawiingin nambe gangoyin e, lemu

yik goo monaanêél Yesu Kalisi-te vakasin lôôt. Goo naanêél lôôt in nambe lambiing gaving, osin gambu kôôvu hil in nambe vakasin galu sil alondpayo be langgilin sil, tonde okaandu hil ak vakasin gaving. De game ganitambo osin game gahekalin e, nganjo goo gambiing kul-anjo vu hil lôôt osin otaahu sil nivasa.

³ + o 4:3 1Ti 4:1; 2Ti 1:13*Angge, vu taamusin ond hil-ame le gambe nanyend in vakasin anivasa keen-ato daka le, malis, yik sil nanyend e biing navu navu in nambe sil gango vakasin heey, tombe sil e langgolin silate kaputung heey in taahu sil hôök va vaalu sen dawiingin-ato. ⁴ + o 4:4 1Ti 4:7*Tombe mem sil galuuuh damind vu vakasin keen-ande gatung nanyend in vakasin vaha vaha mali-malis. ⁵ Lemu hong ond nohvu busin pin galumkook oo biing kul anivasa, goo baaku nimeen-ambe onaanêél banye nivasa vu hil. Tonde yik kul pin sen Anutu vu vu hong-ato, ond goo gambiing keen lôôt.

Pol nêêl nambe ngaaho lak in yite kul navu jung na

⁶ + o 4:6 Pil 2:17*Gêên saatu salivangin vu Anutu nambe sen hil datooy wain natu salivangin vu Anutuu-to. In busin sen sa navu gavuuh kul-ande sana lak-ato ngaaho lak lung la. ⁷ + o 4:7 1Ti 6:12*In soo monatup niwêêk lôôt-ambe mem gêên saatok valup nalu daambuu-to lung la. Yik soo aawii-having niwêêk. ⁸ + o 4:8 1Ko 9:24-25; Taato 2:10*Gêên Omaaho Bop hatung nôôn anivasa sen hil anivalok-atêêto be nando nanggin sa, in yi omaaho sen yoo nangoyin vakasin-ambe nanêél nivalok, tombe busin-anju ond yoo le bu

nôôn anivasaa-ju vu sa, lemu me-yoo le bu vu
soo timu le, nganjo le bu vu hil pin sen ahend
having nambe lanji yi dôök busin sen naatok
naam langaah-ato.

Vakasin ahus heey

⁹ + o 4:9 2Ti 1:4*Yik goo kandi be ganaam vu sa
pavis,

¹⁰ + o 4:10 Kol 4:14; Tit 1:4*in Demas havuuuh sa
de la Tesalonika in ahe yoo naving va voon-ate,
tonde Klesens la Galata, de Titus la Dalmesia. ¹¹ +
o 4:11 Kol 4:14; Sin 15:37-39*Tonde yik Luk nôôn
timu yoo nando having sa, om onggako Maak
gaving hong-ambe manaam ond mem nivasa in
nambe dôôvu sa in kul. ¹² + o 4:12 Ep 6:21-
22*Saawiing Tikikas la Epesas lung la.

¹³ + o 4:13 Sin 20:6*Ke, om ganaam ond onggako
sate lolop diin sen sa havuuuh nando Kapas am-
baan vu Toloas-ato be onggako kaapiya gaving.
Tonde kaapiya vaalu sen sil samu laksik naavii-
to ond manyinja goo gako naam keen.

¹⁴ + o 4:14 1Ti 1:20; Saam 62:12; Pro 24:12;
Lom 2:6*De Aleksanda sen nawiing kul in nasi
kaapaa-to ond wiing sa paya lôôt, om sim taa-
musin e Omaaho Bop e bu yite nipaya nyevahaan
dukanaah va sen wiing-ato. ¹⁵ Om yik goo gang-
gin hong in omaahôô-ju, in yoo naanggôôl heyate
vakasin lôôt.

¹⁶ + o 4:16 2Ti 1:15*Tombe nyendoos ond soo
timu be saanêêl vakasin laah vu hil sen dango
sate vakasin-ato, de omaaho ti me-naale having
sa be hôôvu sa le, malis, hil pin lavuuuh sa,
om saalohak in nambe Anutu me-ka bu silate
nipayaa-ju le. ¹⁷ + o 4:17 Sin 23:11; 27:23; Dan

6:22*Lemu sak, Omaaho Bop kaandu sa be vu niwêek vu sa, ondeey soo aanêél Kalisi-te vakasin lohvu lôôt vu hil sen dango sate vakasin-ato, be hil alundoos pin langoyin. Tonde Anutu yoo lôôh sa vêêl in omaaho nipaya

nama. ¹⁸ Tonde yik Omaaho Bop yoo le nôôh sa vêêl in va nipaya pin sen hil dawiingin nambe lambiing vu saa-to, de yoo le ganggin sa be gako sa naah baan baandoni. Ond yik Omaaho Bop-anju yite nikaapulis naatu bopaata lôôt-ambe nanjip danggata osin danggata. Keen.

¹⁹ + o 4:19 Sin 18:2; 2Ti 1:16-17*Ke, de onaanêél vu Pliska yuuuh laya Akwila, tonde vu Onesipolas-aso yite hil gaving naambe sa kangg navu sil.

²⁰ + o 4:20 Sin 19:22; 20:4*De Elastas ond haay hato Kolint atombe naahen nandôô-ju, tonde Tolopimas ond nilak om nando Mailitas-ande sa laam. ²¹ Om okandi be ganaam pavis, de game mongganggin busin sen vavi osin lôôy anipayaa-to le. Ke, Yubulas ayuuh Pudens-ande Lainas ayuuh vêêh bop Klodia, tonde yik Yesu-te hil pin having ond kand navu hong.

²² Yik vakasin lung laa-ja. Omaaho Bop mando gaving okanum, de yite samu samu naas mando gaving ham pin.

**Mangga Buang New Testament
The New Testament in the Buang, Mangga Language
of Papua New Guinea
Nupela Testamen long tokples Mangga Buang long
Niugini**

copyright © 1981 Wycliffe Bible Translators, Inc.

Language: Mangga Buang (Buang, Mangga)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-19

PDF generated using Haiola and XeLaTeX on 11 Nov 2022 from source files
dated 9 Oct 2020

8d739032-2a4b-567d-abd1-cb7e24ed2cd6